

日知錄卷之二十七

漢人註經

左氏解經多不得聖人之意元凱注傳必曲爲之疏通殆非也鄭康成則不然其於二禮之經及子夏之傳往往駁正如周禮職方氏荊州其浸潁潁註云潁水出陽城宜屬豫州在此非也豫州其浸波澨註云春秋傳曰除道梁澨營軍臨隨則澨宜屬荊州在此非也儀禮喪服篇唯子不報傳曰女子子適人者爲其父母期故言不報也註云唯子不報男女同不報爾傳以爲主謂女子子似朱之矣女子子爲祖父母傳曰何以期也不敢降其祖也註云經似在室傳似已嫁公妾以及士妾爲其父母傳曰何以期也

妾不得體君得爲其父母遂也註云然則女君有以尊降其父母者與春秋之義雖爲天王后猶曰吾季姜是言子尊不加於父母此傳似誤矣士虞禮篇用尹祭註云尹祭脯也大夫士祭無云脯者今不言牲號而云尹祭亦記者誤矣於禮記則尤多置駁如檀弓篇齊穀王姬之喪魯莊公爲之大功註云當爲舅之妻非外祖母也外祖母又小功也季子臯葬其妻犯人之禾註云恃寵虐民非也叔仲衍請總衰而環絰註云弔服之絰服其舅非月令篇孟夏之月行賞封諸侯註云祭統曰古者於禘也發爵賜服順陽義也於嘗也出田邑發秋政順陰義也今此行賞可也而封諸侯則違於古封諸侯出土地之事於時未可似失

之斷薄刑決小罪註云祭統曰草艾則墨謂立秋後也刑
無輕於墨者今以絕陽之月斷刑決罪與母有壞墮自相
違似非季夏之月命漁師代蛟取鼃登龜取龜註云四者
甲類秋乃堅成周禮曰秋獻龜魚又曰凡取龜用秋時是
夏之秋也作月令者以爲此秋據周之時也周之八月夏
之六月圖書於此似誤也孟秋之月毋以封諸侯立大官
毋以割地行大使出大幣註云古者於嘗出田邑此其嘗
竝秋而禁封諸侯割地失其義郊特牲篇季春出火註云
言祭社則此是仲春之禮也仲春以火田田正弊火然後
獻禽至季春火出而民乃用火今云季春出火乃牧誓社
記者誤也郊之用辛也周之始郊日以至註云言日以周

郊天之月而至陽氣新用事順之而用辛日此說非也郊天之月而日至魯禮也三王之郊一用夏正魯以無冬至祭天於圓丘之事是以建子之月郊天示先有事也尸陳也註云尸或詁爲主此尸神象當從主訓之言陳非也明堂位篇夏后氏尚明水殷尚醴周尚酒註云此皆其時之用耳言尚非君臣未嘗相弑也禮樂刑法政俗未嘗相變也註云春秋時魯三君弑又士之有誅由莊公始婦人鬻而弔始於臺駘云君臣未嘗相弑政俗未嘗相變亦近誣矣禘記下或曰主之而附於夫之黨註云妻之黨自主之非也圭子男五十註云子男執璧作此贊者失之矣此其所駁雖不盡當視杜氏之專阿傳文則不同矣經註之中

可謂卓然者乎

論語子見南子註孔安國曰行道既非婦人之事而弟子不說與之呪誓義可疑焉此亦漢人疑經而不敢強通者也

宋黃震言杜預註左氏獨王左氏何休註公羊獨王公羊惟范甯不私於穀梁而公言三家之失如曰左氏以鬻參兵諫爲愛君是人主可得而脅也以文公納幣爲用禮是君喪可得而昏也穀梁以衛輒拒父爲尊祖是爲子可得而叛也不納子糾爲內惡是仇讐可得而容也公羊以祭仲廢君爲行權是神器可得而闚也妾母稱夫人爲合正是嫡庶可得而齊也又曰左氏艷而富其失也誣穀梁清

而婉其失也短公羊辯而裁其失也俗今考集解中糾傳
文者得六事莊九年公伐齊納糾傳當可納而不納齊變
而後伐故乾時之戰不諱敗惡內也解曰讐者無時而可
與通縱納之遲晚又不能全保讐子何足以惡內乎然則
乾時之戰不諱敗齊人取子糾殺之皆不逆其文正書其
事內之大惡不待貶絕居然顯矣惡內之言傳或失之傳
元年公子友帥師敗莒師于麗獲莒挈傳公子友謂莒挈
曰吾二人不相說士卒何罪屏左右而相搏解曰江熙曰
經書敗莒師而傳云二人相搏則師不戰何以得敗理自
不通也子所愼三戰居其一季友令德之人豈當舍三軍
之整佻身獨閭潛刃相害以決勝負者哉此又事之不然

傳或失之僖十四年季姬及繒子遇于防使繒子來朝傳
遇者同謀也解曰魯女無故遠會諸侯遂得淫通此又事
之不然左傳曰繒季姬來寧公怒之以繒子不朝遇于防
而使來朝此近合人情襄十一年作三軍傳古者天子六
師諸侯一軍作三軍非正也解曰周禮司馬法王六軍大
國三軍次國二軍小國一軍總云諸侯一軍又非制也昭
十一年楚子虔誘蔡侯般殺之于申傳夷狄之君誘中國
之君而殺之故謹而名之也解曰蔡侯般弑父之賊此人
倫之所不容王誅之所必加禮凡在官者殺無赦豈得惡
楚子殺般乎若謂夷狄之君不得行禮於中國者理既不
通事又不然宣十一年楚人殺陳夏徵舒不言天傳曰明

楚之討有罪也似若上下違反不兩立之說哀二年晉趙
鞅帥師納衛世子蒯聵于戚傳納者內弗受也何用弗受
也以輒不受也以輒不受父之命受之王父也信父而辭
王父則是不尊王父也其弗受以尊王父也解曰江熙曰
齊景公廢世子世子還國書纂若靈公廢蒯聵立輒則蒯
聵不得復稱曩日世子也稱蒯聵爲世子則靈公不命輒
審矣此矛盾之喻也然則從王父之言傳似失矣經云納
衛世子鄭世子忽復歸于鄭稱世子明正也明正則拒之
者非邪以上皆糾正傳文之失

宋吳元美作吳縝新唐書糾謬序曰唐人稱杜征南顏祕
書爲左丘明班孟堅忠臣

顏師古本傳

今觀其推廣發明二子

信有功矣至班左語意乘灰處往往曲爲說以會附之安
在其爲忠也令吳君於歐米大手筆乃能糾謬纂誤力裨
前闕殆晏子所謂獻可替否和而不同者此其忠何如哉
然則唐人之論忠也陋矣可謂卓識之言

註疏中引書之誤

爾雅釋山多草木岵無草木岵

疏岵當作岵

石戴土謂之崔嵬

土戴石爲礧毛傳引之互相反鄭康成箋詩采繁引少牢

饋食禮主婦被禡誤作禮記皇矣引左傳鄭公子突使勇

而無剛者嘗寇而速去之晉士會若使輕者肆焉其可誤

合爲一事註周禮大司徒引左傳成二年先王疆理諸侯

誤作吾子疆理天下引詩錫之山川土田附庸誤作土地

射人引射義明乎其節之志以不失其事則功成而德行
立誤作樂記縣士引左傳韓襄爲公族大夫誤作韓須註
禮記月令引夏小正八月丹鳥羞白鳥誤作九月引詩稱
彼兕觥萬壽無疆誤作受福無疆范武子解穀梁傳莊十
八年引玉藻天子玄冕而朝日於東門之外誤作王制郭
景純註爾雅引孟子止或尼之誤作行或尼之引易輟用
黃牛之革固志也誤以革遯二爻合爲一傳韋昭國語註
公父文伯母賦綠衣之三章誤引四章高誘淮南子註引
詩鼙鼓逢逢誤作鼙鼓洋洋孔穎達左傳文十八年正義
引孟子柳下惠聖之和者也誤作伊尹聖人之和者也蘇
軾書傳伊訓引孟子從流下而忘反謂之流誤作從流上

而忘反謂之游朱震易傳井大象引詩維此哲人謂我劬
勞誤作知我者謂我劬勞趙汝樸易輯聞蹇大象引孟子
我必不仁我必無禮誤作我必不仁不義朱元晦中庸章
句引詩后稷之孫實維大王居岐之陽實始翦商誤作至
于大王詩集傳閔予小子引楚辭三公穆穆登降堂只誤
作三公揖讓

朱子註論語夏曰瑚商曰璉此仍古註之誤記曰夏后氏
之四璉殷之六瑚是夏曰璉商曰瑚也享禮註引發氣滿
容今儀禮文作發氣焉盈容漢人避惠帝諱盈之字曰滿
此當改而不改也

孟子有爲神農之言註史遷所謂農家者流也仁山金氏

曰太史公六家同異無農家班固藝文志分九流始有農家者流集註偶誤未及改

楊用修言朱子周易本義引韓非子參之以比物伍之以合虛誤以合虛爲合參原其故乃自荀子註中引來不自韓非子采出也按伍所以合參安得謂之合虛乃今韓非子本誤

姓氏之誤

穀梁傳隱九年天王使南季來聘南氏姓也季字也南非姓姓字衍文桓二年及其大夫孔父孔氏父字諡也父非諡諡字衍文

詩白華箋褒姒褒人所入之女姒其字也字當作姓此康

成之誤孔氏曰褒國妣姓言妣其字者婦人因姓爲字也
乃是曲爲之解耳

朱子註論語孟子如太公姜姓呂氏名尚其別姓氏甚明
至子夏孔子弟子姓卜名商子禽姓陳名亢子貢姓端木
名賜子文姓鬬名穀於菟之類皆以氏爲姓齊宣王姓田
氏名辟疆則併姓氏而爲一矣豈承昔人之誤而未之正
與宋自夾漈鄭氏始著氏族畧以前人多未講此故博古
圖言州吁姓州而徽宗欲倣周人王姬之號故公主謂
之帝姬也

左傳註

隱五年使曼伯與子元潛軍軍其後按子元疑卽厲公之
字昭十一年申無宇之言曰鄭莊公城櫟而寘子元焉使

昭公不立杜以爲別是一人厲公因之以殺曼伯而取櫟
非也蓋莊公在時卽以櫟爲子元之邑如重耳之蒲夷吾
之屈故厲公於出奔之後取之特易而曼伯則爲昭公守
櫟者也九年公子突請爲三覆以敗戎桓五年子元請爲
二拒以敗王師固卽厲公一人而或稱名或稱字耳合三
事觀之可以知厲公之才畧而又資之以巖邑能無篡國
乎

十一年立桓公而討爲氏有死者言非有名位之人蓋微
者爾如司馬昭族成濟之類解曰欲以弑君之罪加爲氏
而復不能正法誅之非也

桓二年孔父嘉爲司馬杜氏以孔父名而嘉字非也孔父

字而嘉其名按家語本姓篇曰宋湣公熙生弗父何何生

宋父周周生世子勝勝生正考父考父生孔父嘉其後以

孔爲氏然則仲尼氏孔正以王父之字而楚成嘉鄭公子

嘉皆字子孔亦其證也

說文孔从乙从子乙至而得子嘉美之也古人各嘉字子孔鄭

康成註士喪禮曰某甫字也若言山甫孔甫

甫父通

是亦以

孔父爲字劉原父以爲已名其君於上則不得字其臣於

下竊意春秋諸侯卒必書名而大夫則命卿稱字無生卒

之別

劉原父亦云大夫再命稱名三命稱字

亦未嘗以名字爲尊卑之分桓

十一年鄭伯寤生卒葬鄭莊公宋人執鄭祭仲

杜氏以仲爲名而足

字亦拘於例也

十七年蔡侯封人卒蔡季自陳歸于蔡名其君於

上字其臣於下也昭二十二年劉子單子以王猛居於皇

劉子單子以王猛入於王城二十三年尹氏立王子朝二十六年尹氏召伯毛伯以王子朝奔楚爵其臣於上名其君於下也然則孔父當亦其字而學者之疑可以渙然釋矣

君之名變也命卿之書字常也重王命亦所以尊君也其弟以千畝之戰生解曰西河界休縣南有地名千畝非也穆侯時晉境不得至介休按史記趙世家周宣王伐戎及千畝戰正義曰括地志云千畝原在晉州岳陽縣北九十里

五年蔡人衛人陳人從王伐鄭解曰王師敗不書不以告非也王師敗不書不可書也爲尊者諱

六年不以國解曰國君之子不自以本國爲名焉有君之子而自名其國者乎謂以列國爲名若定公名宋哀公名蔣

八年楚人上左君必左無與王遇解曰君楚君也愚謂君謂隋侯王謂楚王兩軍相對隨之左當楚之右言楚師左堅右瑕君當在左以攻楚之右師

十三年及齊侯宋公衛侯燕人戰齊師宋師衛師燕師敗績解曰或稱人或稱師史異辭也愚謂燕獨稱人其君不在師

莊十二年蕭叔大心解曰叔蕭大夫名按大心當是其名而叔其字亦非蕭大夫也二十三年蕭叔朝公解曰蕭附